

四庫全書

史部

欽定四庫全書

舊五代史卷四十五

宋門下侍郎參知政事監修國史薛居正等撰

唐書第二十一

閔帝紀

閔帝諱從厚小字菩薩奴明宗第三子也母昭懿皇后
夏氏以天祐十一年歲在甲戌十一月二十八日庚申
生帝于晉陽舊第帝髫鬣好讀春秋畧通大義貌類明

宗尤鍾愛天成元年授金紫光祿大夫檢校司徒二年四月加檢校太保同平章事河南尹判六軍諸衛事十一月加檢校太傅三年三月授汴州節度使四年移鎮河東長興元年改授鎮州節度使尋封宋王二年加檢校太尉兼侍中移鎮鄴都三年加中書令秦王從榮帝同母兄也以帝有望德深所猜忌帝在鄴宮恒憂其禍然善于承順竟免間隙四年十一月二十日秦王誅翼日明宗遣宣徽使孟漢瓊馳驛召帝二十六日明宗崩

二十九日帝至自鄴十二月癸卯朔發喪于西宮帝于
樞前即位丁未羣臣上表請聽政表再上詔允己酉中
外將士給賜有差庚戌帝緣服見羣臣于廣壽門之東
廡下宰臣馮道進曰陛下久居哀毀臣等咸願一覩聖
顏朱弘昭前舉帽羣臣再拜而退御光政樓存問軍民
辛亥賜司衣王氏死坐秦王事也癸丑以前鎮州節度
使涇王從敏權知河南府事尋以盧質代之乙卯賜司
儀康氏死事連王氏也丙辰以天雄軍節度判官唐汭

為諫議大夫掌書記趙彖為起居郎元從都押衙宋令
詢為磁州刺史丁巳以左僕射平章事馮道為山陵使
戶部尚書韓彥輝為副中書舍人王延為判官禮部尚
書王權為禮儀使兵部尚書李麟為鹵簿使御史中丞
龍敏為儀仗使右僕射權知河南府盧質為橋道頓遞
使庚申以前相州刺史郝瓊為右驍衛大將軍充宣徽
北院使以光祿卿充三司副使王玟為三司使癸亥故
檢校太尉右衛上將軍充三司使孫岳贈太尉齊國公

丁卯帝釋縗服羣臣三上表請復常膳御正殿從之辛未
帝御中興殿羣臣列位馮道升階進酒帝曰比于此物
無愛除賓友之會不近罇箚況在沉痛之中安事飲啖
命徹之

應順元年春正月壬申朔帝御廣壽殿視朝百寮詣閣
門奉慰時議者云月首以常服臨不視朝可也乙亥契

丹遣使朝貢

遼史太宗紀天顯九年閏月戊午
唐遣使來告哀即日遣使祭吊

丁丑以

太常卿崔居儉為秘書監以前蔡州刺史張繼祚為左

武衛上將軍充山陵橋道頓遞副使戊寅御明堂殿仗
衛如儀宮懸樂作羣臣朝服就位宣制大赦天下改長
興五年為應順元年時議者以梓宮在殯宮懸樂作非
禮也懸而不作可也回鶻可汗仁美遣使貢方物故可
汗仁裕進遺留馬是日命中使三十五人以先帝鞍馬
衣帶分賜藩位庚辰宰臣馮道加司空李愚加右僕射
劉昫加吏部尚書餘竝如故壬午侍衛親軍馬步軍都
指揮使河陽節度使康義誠加檢校太尉兼侍中判六

軍諸衛事甲申以侍衛馬軍都指揮使寧國軍節度使
安彥威為河中節度使以侍衛步軍都指揮使忠正軍
節度使張從賓為涇州節度使竝加檢校太傅以捧聖
左右廂都指揮使欽州刺史朱洪實為寧國軍節度使
加檢校太保充侍衛馬軍都指揮使以嚴衛左右廂都
指揮使巖州刺史皇甫遇為中正軍節度使檢校太保
充侍衛步軍都指揮使戊子樞密使檢校太尉同平章
事朱弘昭樞密使檢校太尉同中書門下二品馮贇竝

加兼中書令北京留守河東節度使兼大同彰國振武
威塞等軍藩漢馬步總管石敬瑭加兼中書令幽州節
度使檢校太尉兼中書令趙德鈞加檢校太師兼中書
令樞密使馮贇表堅讓中書令制改兼侍中封邠國公
庚寅鳳翔節度使潞王從珂加兼侍中青州節度使檢
校太尉兼中書令房知溫加檢校太師辛卯以翰林學
士承旨尚書右丞李懌為工部尚書以秘書監盧文紀
為太常卿充山陵禮儀使壬辰荆南節度使檢校太尉

兼中書令高從誨封南平王湖南節度使檢校太尉兼
中書令馬希範封楚王甲午兩浙節度使檢校太師守
中書令吳王錢元瓘進封吳越王前洺州團練使皇甫
立加檢校太保充鄜州節度使前彰義軍節度使康福
加檢校太傅充邠州節度使劔南東西兩川節度使檢
校太尉兼中書令蜀王孟知祥加檢校太師制下知祥
辭不受命丙申鎮州節度使檢校太尉兼侍中范延光
汴州節度使檢校太尉兼侍中趙延壽並加檢校太師

戊戌山南西道節度使檢校太傅同平章事張虔釗襄
州節度使趙在禮竝加檢校太尉辛丑以振武軍節度
使安北都護楊檀兼大同彰國振武威塞等軍都虞候
充北面馬軍都指揮使閏月壬寅朔羣臣赴西宮臨癸
卯御文明殿入閣以前右僕射權知河南府事盧質為
太子少傅兼河南尹以諫議大夫唐洎膳部郎中知制
誥陳乂竝為給事中充樞密院直學士

通鑑洎以文學
從帝歷三鎮在

幕府及即位將佐之有才者朱馮皆斥逐之洎性迂疎
朱馮恐帝含怒有時而發乃引洎于密近以其黨陳乂

監之宣徽南院使驃騎大將軍左衛上將軍知內侍省孟

漢瓊加開府儀同三司賜忠貞扶運保泰功臣丙午正

衙命使冊皇太后曹氏戊申以前雄武軍節度使劉仲

殷為右衛上將軍邢州節度使趙鳳加爵邑自是諸藩

鎮文武臣寮皆次第加恩帝嗣位覃恩澤也以翰林學

士中書舍人崔祐為工部侍郎依前充職以給事中張

鵬為御史中丞以御史中丞龍敏為兵部侍郎以太僕

少卿竇維為大理卿甲寅正衙命使冊皇太妃王氏集

賢院上言準敕書修創凌煙閣尋奉詔問閣高下等級謹按凌煙閣都長安時在西內三清殿側畫像皆北面閣有中隔隔內面北寫功高宰輔南面寫功高諸侯王隔外面次第圖畫功臣題贊自西京板蕩四十餘年舊日主掌官吏及畫像工人竝已淪喪集賢院所管寫真官畫真官人數不少都洛後廢職今將起閣望先定佐命功臣人數請下翰林院預令寫真本及下將作監興功次序間架修建乃詔集賢御書院復置寫真官畫真

官各一員餘依所奏丁巳安州奏此月七日夜節度使符彥超為部曲王希全所害廢朝一日戊午以前振武軍節度使安北都護高行周為彰武節度使辛酉以前鄆州使范政為少府監丙寅辛至德宮車駕至興教門有飛鳶自空而墜殭于御前是日大風晦冥二月乙亥以前鎮州節度使涇王從敏為宋州節度使已外以前徐州節度使檢校太傅李敬周為安州節度使是日宣授鳳翔節度使潞王從珂為權北京留守以北京留守

石敬瑭權知鎮州軍州事以鎮州范延光權知鄴都留守事以前河中節度使洋王從璋權知鳳翔軍軍府事
庚寅幸山陵工作所是日西京留守王思同奏鳳翔節度使潞王從珂拒命丁酉王思同加同平章事充西面行營都部署以前邠州節度使藥彥稠為副部署以河中節度使安彥威為西面兵馬都監以前定州節度使李德瓌為權北京留守山陵使奏伏覲御札皇帝親奉靈駕至園陵伏見累朝故事人君無親送葬之儀請車

駕不行不從乙未樞密使馮贇起復視事時贇丁母憂也已亥以司農卿張鎰為殿中監庚子殿直楚匡祚上言監取亳州團練使李重吉至宋州繫于軍院重吉潞王之長子及幽于宋州帝猶以金帛賜之及聞西師咸叛方遣使殺之三月甲辰以前太僕少卿魏仁錡為太僕卿興元節度使張虔釗奏會合討鳳翔丙午以右領衛上將軍武延翰為郢州刺史丁未洋州孫漢韶奏至興元與張虔釗同議進軍己酉以鎮州節度使范延光

依前檢校太師兼侍中行興唐尹充天雄軍節度使北
面水陸轉運制置使以北京留守河東節度使石敬瑭
依前檢校太尉兼中書令其真定尹充鎮州節度使大
同彰國振武威塞等軍蕃漢馬步總管如故辛亥以前
定州節度使李德琬為北京留充河東節度使許王從
益加檢校太保前河中節度使洋王從璋加檢校太傅
詔蕃侯帶平章事以上薨許立神道碑差官撰文未帶
平章事及刺史準令式合立碑者其文任自製撰不在

奏聞乙卯興元張虔釗奏自鎮將兵赴鳳翔收大散關
宗正寺奏準故事諸陵有令丞各一員近例更委本縣
令兼之緣河南洛陽是京邑兼令丞不便詔特置陵臺
令丞各一員已未以前金吾大將軍李肅為左衛上將
軍充山陵修奉上下宮都部署庚申西面步軍都監王
景從等自軍前至奏今月十五日大軍進攻鳳翔十六
日嚴衛右廂都指揮使尹暉引軍東面入城右羽林都
指揮使楊思權引軍西面入城山南軍潰帝聞之謂康

誠等曰朕幼年嗣位委政大臣兄弟之間必無榛梗諸公大計見告朕獨難違事至于此何方轉禍朕當與左右自往鳳翔迎兄主社稷朕自歸藩于理為便朱弘昭馮贇不對義誠曰西師驚潰蓋由主將失策今駕下兵甲尚多臣請自往關西振其兵威扼其衝要義誠又累奏請行帝召侍衛都將以下宣曰先皇帝棄萬國朕于兄弟之中無心爭立一旦被召主喪便委社稷岐陽兄長果致猜嫌卿等頃從先朝千征萬戰今日之事寧不

痛心今據府庫悉以頒賜卿等勉之乃出銀絹錢厚賜于諸軍是時方事山陵復有此賜府藏為之一空軍士猶負賞物揚言于路曰到鳳翔更請一分其驕誕無畏如是辛酉辛左藏庫視給將士金帛是日誅馬軍都指揮使朱洪實坐與康義誠忿爭故也癸亥以康義誠為鳳翔行營都招討使餘如故以王思同為副招討使以安從進為順化軍節度使充侍衛馬軍都指揮使詔左右羽林軍四十指揮改為嚴衛左右龍武神武軍改為

捧聖甲子陝州奏潞王至潼關害西面都部署王思同
乙亥宣諭西面行營將士俟平鳳翔日人賞二百千府
庫不足以宮闈服翫增給詔侍衛馬軍都指揮使安從
進京城巡檢是日從進已得潞王書檄潛布腹心矣丁
卯潞王至陝州戊辰帝急召孟漢瓊不至召朱弘昭弘
昭懼投于井安從進尋殺馮贇于其第是夜帝以百騎
出玄武門謂控鶴指揮使慕容遷曰爾誠有馬控鶴從
予及駕出即闔門不行遷乃帝素親信者也臨危如是

人皆惡之是月二十九日夜帝至衛州東七八里遇騎
從自東來不避左右叱之乃曰鎮州節度使石敬瑭也
帝喜敬瑭拜舞于路帝下馬慟哭諭以潞王危社稷康
義誠以下叛我無以自庇長公主見教逆爾于路謀社
稷大計敬瑭曰衛州王弘贄宿舊諳事且就弘贄圖之
敬瑭即馳騎而前見弘贄曰主上播遷至此危迫吾戚
屬也何以圖全弘贄曰天子避狄古亦有之然于奔迫
之中亦有將相國寶法物所以軍長膽奉不覺其亡也

今宰執近臣從乎寶玉法物從乎詢之無有弘贄曰大樹將顛非一繩所維今以五十騎奔竄無將相一人擁從安能興復大計所謂蛟龍失雲雨者也今六軍將士總在潞邸矣公縱以戚藩念舊無奈之何遂與弘贄同謁于驛亭宣坐謀之敬瑭以弘贄所陳以聞弓箭庫使沙守榮奔洪進前謂敬瑭曰主上即明宗愛子公即明宗愛婿富貴既同受休戚合共之今謀于戚藩欲期安復翻索從臣國寶欲以此為辭為賊算天子耶乃抽佩

刀刺敬瑭敬瑭親將陳暉扞之守榮與暉單戰而死洪
進亦自刎是日敬瑭盡誅帝之從騎五十餘輩獨留帝
于驛乃馳騎趨洛四月三日潞王入洛五日即位七日
廢帝為鄂王遣弘贇子殿直王巒之衛州時弘贇已奉
帝幸州解九日巒至帝遇鵠而崩時年二十一是日辰
時白虹貫日皇后孔氏在宮中及王巒迴即日與其四
子竝遇害晉高祖即位謚曰閔與秦王及末帝子重吉
竝葬于徽陵域中封纔數尺路人觀者悲之

史臣曰閔帝爰自沖年素有令問及徵從代邸入踐堯
階屬軒皇之弓劍初遺吳王之几杖未賜遽生猜間遂
至奔亡蓋輔臣無安國之謀非少主有不君之咎以至
越在草莽失守宗祧斯蓋天命之難忱土德之將謝故
也

舊五代史卷四十五

舊五代史卷四十五考證

唐閔帝紀閔帝諱從厚小字菩薩奴明宗第三子也

案歐陽史作明宗第五子吳縝常辨其誤今攷五代會要亦作第三子與是書同

十二月癸卯朔 案五代春秋作癸亥朔蓋傳寫之訛
歐陽史通鑑俱從是書作癸卯

節度使符彥超為部曲王希全所害 案彥超被害通鑑從是書作閏月五代春秋繫于正月殊誤

丁酉王思同加同平章事充西面行營都部署以前邠
州節度使樂彥稠為副部署 案歐陽史辛卯西京
留守王思同為西面行營都部署靜難軍節度使樂
彥稠為副是書作丁酉與歐陽史異据通鑑則思同
以辛卯充都部署丁酉加同平章也蓋採薛歐二史
而兼用之

殿直楚匡祚上言 楚匡祚原本作楚祚今從通鑑增
匡字

陝州奏潞王至潼關害西面都部署王思同 歐陽史
作思同奔歸于京師死之與是書異

是夜帝以百騎出玄武門 案契丹國志愍帝領五十
騎自隨出奔衛州宋史李洪信傳又作少帝東奔捧
聖軍數百騎從行與是書異据下文王弘贄曰今以
五十騎奔竄則作五十騎者是也

九日繼至帝遇酖而崩 案契丹國志云王繼至衛州
進酖于愍帝愍帝不飲繼繼殺之與是書異

舊五代史卷四十五 攷證

欽定四庫全書

舊五代史卷四十六

宋門下侍郎參知政事監修國史薛居正等撰

唐書第二十二

末帝紀上

末帝諱從珂本姓王氏鎮州人也母宣憲皇后魏氏以
光啟元年歲在己巳正月二十三日生帝于平山景福
中明宗為武皇騎將畧地至平山遇魏氏擄之帝時年

十餘歲明宗養為己子小字二十三帝幼謹重寡言及壯長七尺餘方頤大體村貌雄偉以驍果稱明宗甚愛之在太原嘗與石敬瑭因擊毬同入于趙襄子之廟見其塑像屹然起立帝祕之私心自負及從明宗征討以力戰知名莊宗嘗曰阿三不惟與我同齒敢戰亦相類莊宗與梁軍戰于胡柳陂兩軍俱撓帝衛莊宗奪土山摧驍陣其軍復振時明宗先渡河莊宗不悅謂明宗曰公當為吾死渡河安往明宗待罪莊宗以帝從戰有功

由是解慍天祐十八年莊宗營于河上議討鎮州留守
符存審在德勝砦未行梁人謂莊宗已北乃悉衆攻德
勝莊宗命明宗存審為兩翼以抗之自以中軍前進梁
軍退郛帝以十數騎雜梁軍而退至壘門大呼斬首數
級奔其望櫓而還莊宗大噓曰壯哉阿三賜酒一器同
先元年四月從明宗襲破郛州九月莊宗敗梁將王彥
章于中都急趨汴州明宗將前軍帝率勁騎以從晝夜
兼行率先下汴城莊宗勞明宗曰復唐社稷卿父子之

功也二年以帝為衛州刺史時有王安節者昭宗朝相杜讓能之宅吏也安節少善賈得相銜于奇士因事見帝于私邸退謂人曰真北方天王相也位當為天子終則我莫知也三年明宗奉詔北禦契丹以家在太原表帝為北京內衙指揮使莊宗不悅以帝為突騎都指揮使遣戍石門四年魏州軍亂明宗赴洛時帝在橫水率部下軍士由曲陽孟縣趨常山與王建立會倍道兼行渡河而南由是明宗軍聲大振天成初以帝為河中節

度使明年二月加檢校太保同平章事十一月加檢校太傅長興元年加檢校太尉先是帝與樞密使安重誨在常山因杯盤失意帝以拳擊重誨腦中其櫛走而獲免帝雖悔謝然重誨終銜之及帝鎮河中重誨知其出入不時因矯宣中旨令牙將楊彥溫遇出郭則閉門勿納是歲四月五日帝閱馬于黃龍莊彥溫閉城拒帝帝聞難遽還遣問其故彥溫曰但請相公入朝此城不可入也帝止虞鄉以聞明宗詔帝歸闕遣藥彥稠將兵討

彥溫令生致之面要鞠問十一月收城彥溫已死明宗以彥稠不能生致彥溫甚怒之後數日安重誨以帝失守諷宰相論奏行法明宗不悅重誨又自論奏明宗曰朕為小將校時家徒衣食不足賴此兒荷石灰收馬糞存養以至今貴為天子而不能庇一兒卿欲行朝典朕未曉其義卿等可速退從他私第間坐遂詔歸清化里第不預朝請帝尚懼重誨多方危陷但日諷佛書陰禱而已二年安重誨得罪帝即授左衛大將軍未幾復檢

校太傅同平章事行京兆尹充西京留守三年進位太尉移鳳翔節度使四年五月封潞王閔帝即位加兼侍中既而帝子重吉出刺亳州女尼入宮帝方憂不測應順元年二月移帝鎮太原是時不降制書唯以宣授而已帝聞之召寶佐將吏以謀之皆曰主上年幼未親庶事軍國大政悉委朱弘昭等王必無保全之理判官馬胤孫曰君命召不俟駕行馬諸君凶言非令圖也是夜帝令李專美草檄求援諸道欲誅君側之罪朝廷命王

思同率師來討三月十五日外兵大集

九國志李彥琦傳潞王守歧下

諸道將急攻其壘彥琦時在園中罄家財以給軍用

十六日大將督衆攻城帝登

城垂泣諭于外曰我年未二十從先帝征伐出生入死

金瘡滿身樹立得社稷軍士從我登陣者多矣今朝廷

信任賊臣殘害骨肉且我有何罪因慟哭聞者哀之時

羽林都指揮使楊思權謂衆曰大相公吾主也遂引軍

自西門入嚴衛都指揮使尹暉亦引軍自東門而入外

軍悉潰十七日率居民家財以賞軍士是日帝罄衆而

東二十日次長安副留守劉遂雍以城降率京兆居民
家財犒軍二十三日次靈口誅王思同二十四日次華
州收藥彥稠繫獄二十五日次閿鄉王仲臯父子迎謁
命誅之二十六日次靈寶河中節度使安彥威來降待
罪宥之遣歸鎮陝州節度使康思立奉迎二十七日次
陝州下令告諭京城二十八日康義誠軍前兵士相繼
來降義誠詣軍門請罪帝宥之駕下諸軍畢至誅宣徽
南院使孟漢瓊于路左是夜閔帝與帳下親騎百餘出

玄武門而去夏四月壬申帝至將橋文武百官立班奉迎教旨以未拜梓宮未可相見俟會于至德宮時六軍勲臣及節將內職已累表勸進是日帝入謁太后太妃至西宮伏梓宮慟哭宰相與百寮班見致拜帝答拜馮道等上牋勸進帝立謂羣臣曰予之此行事非獲已當俟主上歸闕園陵禮終退守藩服諸公言遽及此信無謂也衛州刺史王弘贄奏閔帝以前月二十九日至州癸酉皇太后下令降閔帝為鄂王又太后令曰先皇帝

誕膺天睠光紹帝圖明誠動于三靈德澤被于四海方
期偃革遽歎遺弓自少主之承祧為奸臣之擅命離間
骨肉猜忌磐維既軌易于藩垣復驟興于兵甲遂致輕
離社稷大撓軍民萬世鴻基將墜于地皇長子路王從
珂位居冢嗣德茂冲年乃武乃文惟忠惟孝前朝廓清
多難有戰伐之大功績紹丕圖有夾輔之盛業今以宗
祧乏嗣園寢有期須委親賢俾居監撫免萬機之壅滯
慰兆庶之推崇可起今日知軍國事權以書詔印

施行是日監國在至德宮宰臣馮道等率百官班于宮門待罪帝出于庭曰相公諸人何罪請復位乃退甲戌太后令曰先皇帝櫛風沐雨平定華夷嗣洪業于艱難致蒼生于富庶鄂王嗣位奸臣弄權作福作威不誠不信離間骨肉猜忌磐維鄂王輕捨宗祧不克負荷洪基大寶危若綴旒須立長君以紹丕構皇長子潞王從珂日躋孝敬天縱聰明有神武之英姿有寬仁之偉畧先朝經綸草昧廓靜寰區辛勤有百戰之勞忠貞贊一統

之運臣誠子道冠古超今而又克已化民推心撫士率
土之謳歌有屬上蒼之睠命攸臨一日萬幾不可以暫
曠九州四海不可以無歸況因山有期同軌斯至永言
嗣守屬任元良宜即皇帝位乙亥監國赴西宮樞前告
奠即位攝中書令李愚宣冊書曰維應順元年歲次甲
午四月庚午朔六日乙亥文武百寮特進守司空兼門
下侍郎同中書門下平章事充太微宮使弘文館大學
士上柱國始平郡公食邑二千五百戶臣馮道等九千

五百九十三人上言帝王興運天地同符河出圖而洛
出書雲從龍而風從虎莫不恢張八表覆育兆民立大
定之基保無疆之祚人謠再洽天命顯歸須登宸極之
尊以奉祖宗之祀伏惟皇帝陛下天資仁智神助機權
奉莊宗于多難之時從先帝于四征之際凡當決勝無
不成功洎正皇綱每嚴師律為國家之志大守臣子之
道全自泣遺弓常悲易月欲期同軌親赴因山而自鄂
王承祧奸臣擅命致神祇之乏饗激朝野以歸心使屈

者伸令否者泰人情大順天象至明聚東井以呈祥拱
北辰而應運由是文武百辟岳牧羣賢至于比屋之倫
盡祝當陽之位今則承太后慈旨守先朝遠圖撫四海
九州享千齡萬祀臣等不勝大願謹上寶冊稟太后令
奉皇帝踐祚臣等誠慶誠忭謹言帝就殿之東楹受羣
臣稱賀先是帝在鳳翔日有瞽者張濛自言知術數事
太白山神其神祠即元魏時崔浩廟也時之否泰人之
休咎濛告于神即傳吉凶之言帝親校房畧酷信之一

日濛至府聞帝語聲駭然曰非人臣也曷詢其事即傳神語曰三珠併一珠驢馬没人驅歲月甲庚午中興戊己土曷請解釋曰神言予不知也長興四年五月府解諸門無故自動人頗駭異遣曷問濛濛曰衙署小異勿怪不出三日當有恩命是夜報至封潞王及帝移鎮河東甚懼問濛濛曰王保無患王思同兵至又詰之濛曰王有天下不能獨力朝廷兵來迎王也王若疑臣臣惟一子請王致之麾下以質臣心帝乃以濛攝館驛巡官

至是帝受冊冊曰維應順元年歲次甲午四月庚午朔
帝迴視房暈曰張濛神言甲庚午不亦異乎帝令暈共
術士解三珠一珠事言三珠三帝也驢馬没人驅失位
也帝即位之後以濛為將作少監同正仍賜金紫以酬
之帝初封潞王言事者云潞字一足已入洛矣又帝在
鳳翔日有何叟者年踰七十暴卒見陰官凭几告叟曰
為我言于潞王來年三月當為天子二十三年叟既蘇
懼不敢言逾月復卒陰官見而叱之曰安得違吾旨不

達其事再放汝還退見廊廡下簿書以問主者曰朝代將易此即昇降人爵之籍也及蘇詣帝親校劉延朗告之帝召而問之叟曰請質之此言無徵戮之可也後人云二十三蓋帝之小字也又石壕人胡杲通善天文帝召問之曰王貴不可言若舉動宜以乙未年及舉兵又問之杲通曰今歲部首王者不宜建功立事若俟來朝入朝則福祚永遠矣其後皆驗夫如是則大寶之位必有冥數可輕道哉丙子詔河南府率京城居民之財以

助賞軍丁。又詔預借居民五箇月房課。不問士庶。一
槩施行。帝素輕財好施。自岐下為諸軍推戴。告軍士曰。
候入洛。人賞百千。至是以府藏空匱。于是有配率之令。
京城庶士自絕者相繼。已卯。衛州奏。此月九日。鄂王薨。
庚辰。以宰臣劉昫判三司。辛巳。邢州奏。磁州刺史宋令
詢自經而卒。令詢。鄂王在藩時都押牙也。故。至于是。甲
申。帝以鄂王薨。行服于內園。羣臣奉慰。癸未。太后太妃
出宮中。衣服器用。以助賞軍。乙酉。帝服袞冕。御明堂殿。

文武百寮朝服就位宣制改應順元年為清泰元年大赦天下常赦不原者咸赦除之丁亥以宣徽北院使郝瓊為宣徽南院使權判樞密以前三司使王政為宣徽北院使以隨駕牙將宋審虔為皇城使劉延朗為莊宅使鳳翔節度判官韓昭胤為左諫議大夫充端明殿學士觀察判官馬胤孫為翰林學士掌書記李專美為樞密院直學士戊子侍衛親軍都指揮使康誠義伏誅是日詔曰樞密使朱弘昭馮贇宣徽南院使孟漢瓊西京留

守王思同前邠州節度使藥彥稠共相朋煽妄舉干戈
互興離間之謀幾構傾亡之禍宜行顯戮以快羣情仍
削奪官爵云庚寅鳳翔奏西川孟知祥僭稱大蜀年號
明德有司上言皇帝以五月朔日御明堂殿受朝三日
夏至祀皇地祇前二日奏告獻祖室不坐北正旦冬至
是日有祀事則次日受朝今祀在五鼓前質明行禮畢
御殿在旦後請比例行之詔曰日出御殿舉祀事無妨
宜依常年例史館奏凡書詔及處分公事臣下奏議望

令近臣錄付當館詔端明殿學士韓昭盾樞密直學士
李專美錄送辛卯以左諫議大夫盧損為右散騎常侍

士辰詔賜禁軍及鳳翔城下歸明將校錢帛各有差

通鑑

云禁軍在鳳翔歸命者自楊思權尹暉等各賜二馬一
駝錢七十緡下至軍人錢二十緡其在京者各十緡

初帝離岐下諸軍皆望以不次之賞及從至京師不滿
所望相與謠曰去郤生菩薩扶起一條鐵其無厭如此
丙申葬明宗皇帝于徽陵丁酉奉神主于太廟戊戌山
陵使司空兼門下侍郎平章事馮道上表納政不允五

月庚子朔御文明殿受朝賀乙巳以左龍武指揮使安
審琦為左右捧聖都指揮使以右千牛上將軍符彥饒
為左右嚴衛都指揮使丙午以端明殿學士韓昭胤為
樞密使以莊宅使劉延朗為樞密副使以權知樞密事
房曷為宣徽北院使以成德軍節度使大同彰國振武
威塞等軍蕃漢馬步都部署檢校太尉兼中書令駙馬
都尉石敬瑭為北京留守河東節度使加檢校太師兼
中書令都部署如故汴州節度使檢校太師兼侍中駙

馬都尉趙延壽進封魯國公戊申中書門下奏太常禮院狀明宗以此月二十日祔廟宰臣攝太尉行事緣馮道在假李愚十八日私忌在致齋內劉昫又奏判三司

免祀事

五代會要清泰元年五月宰臣劉昫奏中書以近敕祠祭行事官致齋內唯祀事得行其餘悉

斷又宰臣行事致齋內不押班不赴內殿起居不知印臣緣判三司公事其祀事國忌行香伏乞特免從之

詔禮官參酌有司上言李愚私忌在致齋內諸私忌日

遇大朝會入閣宣召皆赴朝參今祔廟事大忌日屬私

請比大朝會宣召例從之以陝府節度使康思立為邢

州節度使以同州節度使安重霸為西京留守以羽林
右第一軍都指揮使春州刺史楊思權為邠州節度使
己酉左監門衛將軍孔知鄴右驍衛將軍華光裔並勒
停見任時差知鄴應州告廟稱疾辭命改差光裔復稱
馬墜傷足故俱罷之庚戌以司空兼門下侍郎平章事
馮道為檢校太尉同平章事充同州節度使以天雄軍
節度使范延光為樞密使封齊國公鄆州節度使李從
巖為鳳翔節度使辛亥以嚴衛都指揮使尹暉為齊州

防禦使甲寅以侍衛馬軍都指揮順化軍節度使安從
進為河陽節度使典軍如故太常卿盧文紀奏明宗一
室酌獻舞曲請名雍熙之舞從之丁巳以皇子銀青光
祿大夫檢校工部尚書重美為檢校司徒守左衛上將
軍自是諸道節度使刺史文武臣寮相繼加檢校官或
階爵封邑以帝登位覃慶也戊午以隴州防禦使相里
金為陝州節度使初帝以檄書告藩隣惟金遣判官薛
文遇往來計事故以節鎮獎之宣徽北院使檢校工部

尚書房勗加檢校司行左威衛大將軍使如故以樞密
使左諫議大夫韓昭胤為刑部尚書使如故己未太白
晝見以樞密副使劉延朗為左領軍大將軍職如故庚
申左僕射門下侍郎平章事監修國史李愚加特進充
太微宮使弘文館大學士餘如故中書侍郎兼吏部尚
書同平章事集賢院大學士判三司劉昫加門下侍郎
兼吏部尚書平章事監修國史判三司癸亥秦州奏西
川孟知祥出軍迫陷成州以宣徽南院使右驍衛大將

軍郝瓊為左驍衛上將軍職如故以前義州刺史張承祐為武勝軍留後戊辰以前右龍武統軍王景戡為右驍衛上將軍六月庚午朔改侍衛捧聖軍為彰聖改嚴衛軍為寧衛壬申封吳岳成德公為靈應王禮秩同五

岳帝初起遣使祭岳以求祐及登阼故有是報

五代會要載中

書門下奏天寶十載正月封吳公為成德公與沂山會稽醫巫閭同封至德二載十二月改吳山為岳祠享官屬一同五岳今國家以祈禱靈應宜示殊禮臣等商量請加封為靈應王從之

幽州節度使趙

德鈞進封北平王青州節度使房知溫進封東平王癸

酉以前鄆州節度使索自通為右龍武統軍甲戌皇子
左衛上將軍重美加檢校太保同平章事充鎮州節度
使兼河南尹判六軍諸衛事丁丑詔天下見禁罪人委
所在長吏躬親慮問疾速疏決庚辰卒至德宮因幸房
知溫安元信范延光索自通李從敏弟壬午以檢校太
子太傅致仕王建立為檢校太尉兼侍中鄆州節度使
以前宋州節度使安元信為檢校太尉兼侍中潞州節
度使癸未三司使劉昫奏天下戶民自天成二年括定

秋夏田稅迨今八年近者相次有百姓詣闕訴田不均累行蠲放漸失稅額望差朝臣一槩檢視不報甲申帝為故皇子臺州刺史重吉皇長女尼惠明大師幼澄舉哀行服羣臣詣閤門奉慰帝起兵之始重吉幼澄俱為閔帝所害乙酉以戶部侍郎韓彥憚為絳州刺史以左武衛上將軍李肅為單州刺史丙戌襄州節度使趙在禮加同平章事甲午以武勝軍留後張承遷為華州節度使以皇城使宋審虔為壽州節度使充侍衛步軍都

指揮使以右衛上將軍劉仲殷為宋州節度使以侍衛
步軍都指揮使壽州節度使皇甫遇為鄧州節度使以
前華州節度使華溫琦為太子太傅致仕丁酉左神武
統軍周知裕卒贈太傅是月京師大旱熱甚暍死者百
餘人秋七月庚子太子少保致仕崔沂卒癸卯鳳翔進
偽蜀孟知祥來書稱大蜀皇帝獻書于大唐皇帝且言
見迫羣情以今年四月十二日即皇帝位云帝不答以
前武州刺史鄭琮為右衛上將軍甲辰幸龍門佛寺禱

雨乙巳皇子故亳州團練使重吉贈太尉仍于宋州置廟丁未鳳翔節度使李從暉封西平王是日宰臣李愚劉昫因論公事于政事堂相詬辭甚鄙惡帝令樞密副使劉延朗宣諭曰卿等輔弼之臣不宜如是今後不得更然辛亥以太常卿盧文紀為中書侍郎平章事是日中書門下三上章請立中宮從之丁巳制立沛國夫人劉氏為皇氏庚申太子少傅陳臯卒乙丑史官張昭遠以所撰莊宗朝列傳三十卷上之八月庚午詔蠲放長

興四年十二月以前天下所欠殘稅辛未以前尚書左

丞姚顗為中書侍郎平章事詔應曾受御署官逐攝同

一任正官依期限赴選

徐無黨五代史注云御署官疑是廢帝初舉兵時所置之官以

其非吏部正授故須有旨方得選

荆南奏偽卒孟知祥卒其子昶嗣偽

位壬申以尚書禮部侍郎鄭韜光為刑部侍郎以前工

部侍郎楊凝式為禮部侍郎甲戌以前金州防禦使婁

繼英為右神武統軍以右神武統軍高允貞為右神武

統軍乙亥以翰林學士承旨工部尚書知制誥李懌為

太常卿以翰林學士戶部侍郎知制誥程遜為學士承旨甲申以兵部侍郎龍敏為吏部侍郎以秘書監崔居儉為工部尚書乙酉以右武衛上將軍張繼祚為右衛上將軍以右驍衛上將軍王景戡為左衛上將軍以右領衛上將軍劉衡為左武衛上將軍以右千牛上將軍王陟為右領軍上將軍以司農卿兼通事舍人判四方館事王景崇為鴻臚卿依前通事舍人判四方館丁亥右龍武統軍索自通卒辛卯禮部尚書致仕李光憲卒

甲午以太子少傅盧質為太子少師乙未以前邢州節度使趙鳳為太子太保詔文武百官差使宜令依倫次中書置簿不得重疊若當使者自緣有事或不欲行者注簿便當一使自長興三年正月後已曾奉使者便為簿首已後差者次第注之有司上言皇后受冊內外命婦上牋無答教從之丙申御文殿冊皇后命使攝太尉宰臣盧文紀使副攝司徒右諫議大夫盧損詣皇子宫行禮畢恩賜有差九月己亥以久雨分命朝臣營都城

門告宗廟社稷辛丑夜有星如五斛器西南流尾迹長
數丈屈曲如龍形又衆星亂流不可勝數京師大雨雹
如彈丸曹州刺史藥縱之卒甲辰以霖霖甚詔都下諸
獄委御史臺憲錄問諸州縣差判官令錄親自錄問畫
時疏理壬子中書門下舉行長興三年勅常年薦送舉
人州郡行鄉飲酒之時帖太常草定儀注奏聞甲寅以
前潞州節度使檢校太尉同平章事盧文進為安州節
度使己未雲州奏契丹寇境冬十月辛未有雉金色止

于中書政事堂中書門下奏請以正月二十三日皇帝
誕慶日為千春節從之戊寅宰臣李愚劉昫罷相以愚
守左僕射昫守右僕射契丹寇雲應州詔河東節度使
石敬瑭率兵屯代州戊子宰臣姚顗奏吏部三銓近年
併為一司望令依舊分銓從之辛卯以左衛上將軍李
宏元卒廢朝贈司徒癸巳以禮部郎中知制誥呂琦守
本官充樞密院直學士十一月辛丑以刑部侍郎鄭韜
光為尚書右丞以光祿少卿烏昭遠為少府監秦州節

度使張延朗奏率師代蜀中書門下奏二十六日明宗
忌陛下初遇忌辰不同常歲請于忌辰前後各一日不
坐朝從之御史臺奏前任節度使刺史行軍副使雖每
日于便殿起居每遇五日起居亦合綴班從之丙午以
前興州刺史馮暉配同州衙前安置暉為興州刺史屯
乾渠蜀人來侵暉自屯所奔歸鳳翔故有是責丁未詔
振武新州河東西北邊經契丹蹂踐處放免三年兩稅
差配時契丹初退故也癸丑以前華州節度使王萬榮

為左驍衛上將軍致仕甲寅以振武節度使楊光遠充
大同彰國振武威塞等軍兵馬都虞侯以前右金吾大
將軍穆延暉為右武衛上將軍壬戌以禮部侍郎楊凝
式為戶部侍郎甲子以中書舍人盧導為禮部侍郎十
二月丁卯朔詔修奉本朝諸帝陵寢己巳以北面馬軍
都指揮使易州刺史安叔千為安北都護振武節度使
以齊州防禦使尹暉為彰國軍節度使庚午詔葬庶人
從榮有司上言依貞觀中庶人承乾以公禮葬從之乙

亥以秦州節度使張延朗為中書侍郎同平章事判三

司五代會要二年三月宰臣張延朗奏臣判三司公事每日內殿祇候具合綴前班押班伏乞特免從之

以中書侍郎平章事盧文紀為門下侍郎平章事監修國史以中書侍郎平章事姚顗兼集賢殿大學士以前邠州節度使康福為秦州節度使丙戌夜有白氣東西亘天庚寅幸龍門祈雪自九月至是無雨雪故也

舊五代史卷四十六

舊五代史卷四十六考證

唐末帝紀上末帝諱從琦本姓王氏鎮州人也母宣憲
皇后魏氏以光啟元年歲在己巳正月二十三日生
帝于平山景福中明宗為武皇騎將略地至平山遇
魏氏擄之帝時年十餘歲明宗養為己子 案通鑑
考異引唐廢帝實錄云廢帝諱從珂明宗之元子也
母曰宣憲皇后魏氏鎮州平山人中和末明宗徇地
山東留戍平山得魏后帝以光啟元年正月二十三

日生於外舍屬用兵不息音問阻絕帝甫十歲方得
歸宗今考五代會要歐陽史通鑑諸書皆作養子惟
實錄作元子疑因太后令稱為皇長子而傳會也

二十三日次靈口 靈口通鑑唐紀作零口考冊府元
龜亦作靈口今仍其舊

二十七日次陝州 案歐陽史作己巳次陝州是書閔
帝紀作丁卯通鑑從是書

夏四月壬申帝至蔣橋文武百官立官奉迎 案通鑑

四月庚午朔太后令內諸司至乾壕迎潞王考異引
廢帝實錄作三月三十日

癸酉皇太后下令降閔帝為鄂王 案通鑑考異引閔
帝實錄七日廢帝為鄂王廢帝實錄作癸酉薛歐二
史從廢帝實錄

潞字一足已入洛矣 洛原本訛潞今據冊府元龜改
正

甲申 案甲申疑當作壬午以下文即癸未也

舊五代史卷四十六考證

欽定四庫全書

舊五代史卷四十七

宋門下侍郎參知政事監修國史薛居正等撰

唐書第二十三

末帝紀中

清泰二年春正月丙申朔帝御明堂殿受朝賀仗衛如
式乙巳中書門下奏遇千春節凡刑獄公事奏覆候次
月施行今後請重繫者郎候次月輕繫者郎節前奏覆

決遣從之戊申宗正寺奏北京應州曹州諸陵望差本
州府長官朝拜五代會要載宗正寺原奏云北京永興
長寧建極三陵應州遂衍奕三陵准曹州溫陵例下本
州府官朝拜雍坤和徽四陵差太常宗正卿朝拜從之
已酉北京奏光祿卿致仕周玄豹卒庚申鄴都進天王
甲帝在藩時有相士言帝如毗沙天王帝知之竊喜及
卽位選軍士之魁偉者被以天王甲俾居宿衛因詔諸道
造此甲而進之三司奏添徵鰲鹽錢及增麴價先是麴

斤八十文增至一百五十文乙丑雲州節度使張溫移鎮晉州以西京畱守安重霸為雲州節度使二月庚午定州節度使王從溫移鎮兗州振武軍節度使楊檀移鎮定州兼北面行營馬步都虞候甲戌以定州節度使李周為京兆尹充西京畱守以樞密使天雄軍節度使范延光為檢校太師兼中書令充汴州節度使皇子鎮州節度使兼河南尹判六軍諸衛事左右街坊使重美加檢校太尉同平章事充天雄軍節度使餘如故辛巳

以右諫議大夫盧損為御史中丞以御史中丞張鵬為
刑部侍郎壬午寧遠軍節度使馬存加兼侍中鎮南軍
節度使馬希振加兼中書令詔順義軍節度使姚彥章
加兼侍中己丑宰臣盧文紀等上皇妣魯國太夫人尊
謚曰宣憲皇太后請擇日冊命從之三月戊戌故太子
太保趙鳳贈太傅辛丑以前汴州節度使趙延壽為許
州節度使兼樞密使以夏州行軍司馬李彝殷為本州
節度使兄彝超卒故也癸卯以靜海軍節度使檢校太

師兼中書令安南都護錢元鈇為畱守太保餘如故丙午以給事中趙光輔為右散騎常侍戊申皇妹魏國夫人石氏封晉國長公主齊國公主趙氏封燕國長公主己酉有司上言宣憲皇后未及山陵權于舊陵所建廟從之辛亥功德使奏每年誕節諸州府奏薦僧道其僧尼欲立講論科講經科表白科文章應制科持念科禪科聲贊科道士欲立經法科講論科文章應制科表白科聲贊科焚修科以試其能否從之丙辰以右龍武統

軍李德琬為涇州節度使庚申以鎮州節度使知軍府
事董溫琪為鎮州節度使檢校太保壬戌以左右彰聖
都指揮使富州刺史安審琦領楚州順化軍節度使軍
職如故審琦受閔帝命西征至鳳翔而降故有是命是
月太常丞史在德上疏言事其畧曰朝廷任人率多濫
進稱武士者不開計策雖被堅執銳戰則棄甲窮則背
軍稱文士者鮮有藝能多無士行問策謀則杜口作文
字則倩人所謂虛設具員枉耗國力逢陛下惟新之運

是文明革弊之秋臣請應內外所管軍人凡勝衣甲者
請宣下本部大將一一考試武藝短長權謀深淺居下
位有將才者便拔為大將居上位無將畧者移之下軍
其東班臣僚請內出策題下中書令宰臣面試如下位
有大才者便拔居大位處大位無大才者卽移之下僚
其疏大約如此盧文紀等見其奏不悅班行亦多憤排
故諫官劉濤楊昭儉等上疏請出在德疏辨可否宣行
中書覆奏亦駁其錯誤帝詔學士馬肩孫謂曰史在德

語太凶其實難容朕初臨天下須開言路若朝士以言
獲罪誰敢言者爾代朕作詔勿加在德之罪詔曰左補
闕劉濤等奏太常丞史在德所上章疏中書門下駁奏
未奉宣諭乞特施行分明黜陟朕嘗覽貞觀故事見太
宗之治理以貞觀昇平之運太宗明聖之君野無遺賢
朝無闕政盡善盡美無得而名而陝縣丞皇甫德參輒
上封章恣行訛謗人臣無禮罪不容誅賴文貞之彌縫
恕德參之狂瞽魏徵奏太宗曰陛下思聞得失只可恣

其所陳若所言不中亦何損于國家朕每思之誠要言也遂得下情上達德盛業隆太宗之道彌光文貞之節斯著朕惟寡昧獲奉宗祧業業兢兢懼不克荷思欲率循古道簡拔時材懷忠抱直之人虛心渴見便佞詭隨之說杜耳惡聞史在德近所獻陳誠無避忌中書以文字紕繆比類僭差改易人名觸犯廟諱請歸憲法以示戒懲蓋以中書旣委參詳合盡事理朕繼承前緒誘勸將來多言數窮雖聖祖之所戒千慮一得冀愚者之可

從因覽文貞之言遂寬在德之罪已令停寢不遣宣行
劉清等官列諫垣宜陳讜議請定短長之理以行黜陟
之文昔魏徵則請賞德叅今濤等請黜在德事同言異
何相遠哉將議允俞恐虧開納方朝廷粗理俊乂畢臻
畱一在德不足為多去一在德未足為少苟可懲勸朕何
憂焉但緣情在傾輸理難黜責濤等數奏朕亦優容宜
體含弘勉思竭盡凡百在下悉聽朕言夏四月辛巳宰
臣判三司張延朗奏州縣官徵科條格其令錄在任徵

科依限了絕一年加階兩年與試銜三年皆及限了絕
與服色攝任者一年內了絕及攝二年三年內皆及限
與真命其主簿同縣令條本判官一年加階二年改試
銜三年轉官本曹官省限內了絕與試銜諸節級三年
內並了絕者與賞錢三十貫其責罰依天成四年五月
五日勅施行從之癸未御史中丞盧損等進清泰元年
以前十一年制勅堪悠久施行者三百九十四道編為
三十卷其不中選者各令所司封閉不得行用詔其新

編勅如可施行付御史臺頒行以宰相盧文紀兼太微
宮使弘文館大學士姚顗加門下侍郎監修國史張延
朗兼集賢殿大學士以樞密使韓昭胤為中書侍郎兼
兵部尚書平章事乙酉以前武勝軍節度使張萬進為
鄜州節度使辛卯以宣徽南院使劉延皓為刑部尚書
充樞密使以司天監耿瑋為太府卿以偽蜀右衛上將
軍胡杲通為司天監以宣徽北院使房曷為左衛上將軍
充宣徽南院使以樞密副使劉延朗為左領軍上將軍

充宣徽北院使兼樞密副使五月丙申新州振武奏契丹寇境乙巳詔天下見禁囚徒自五月十二日以前除十惡五逆放火烧舍持仗殺人官典犯賊偽行印信合造毒藥并見欠省錢外罪無輕重一切釋放庚戌詔不得貢奉寶裝龍鳳雕鏤刺作組織之物中書奏準勅凡廟諱但迴避正文其偏旁文字不在減少點畫今定州節度使楊檀檀州金壇等名酌情制宜並請改之其表章文案偏旁字闕點畫凡臣寮名涉偏旁亦請改名詔

曰偏旁文字音韻懸殊止避正呼不宜全改楊檀賜名
光遠餘依舊甲寅以戶部侍郎楊凝式為秘書監以尚
書禮部侍郎盧導為尚書右丞以尚書右丞鄭韜光為
尚書左丞丙辰以端明殿學士李導美為兵部侍郎以
端明殿學士李崧為戶部侍郎以翰林學士馬肩孫為
禮部侍郎以禮部郎中充樞密院直學士呂琦為給事
中並充職如故太子少保致仕任圜贈尚書右僕射以
順化軍節度使兼彰聖都指揮使北面行營排陣使安

審珂為邢州節度使庚申以兵部尚書李鱗為太常卿
以禮部尚書王權為戶部尚書以太常卿李懌為禮部
尚書癸亥以六軍諸衛判官給事中張允為右散騎常
侍六月甲子朔新州上言契丹入寇乙丑有司上言宣
憲皇太后陵請以順從為名從之振武奏契丹二萬騎
在黑榆林丁卯以太子少保致仕朱漢賓卒廢朝壬申
命史官修撰明宗實錄契丹寇應州以新州節度使楊
漢賓為同州節度使以前晉州節度使翟璋為新州節

度使庚辰北面招討使趙德鈞奏行營馬步軍都虞候
定州節度使楊光遠行營排陣使邢州節度使安審琦
帥本軍至易州見進軍追襲契丹次河東節度使石敬
瑭奏邊軍乏芻糧其安重榮巡邊兵士欲移振武就糧
從之尋又奏懷孟租稅請指揮于忻代州輸納朝廷以
邊儲不給詔河東戶民積粟處量事抄借仍于鎮州支
絹五萬匹送河東充博采之直是月北面轉運副使劉
福配鎮州百姓車子一千五百乘運糧至代州時水旱

民飢河北諸州困于飛輓逃潰者甚衆軍前使者繼至
督促糧運由是生靈咨怨辛巳詔諸州府署醫博士丙
戌以前許州節度使李從昶為右龍武統軍以前彰國
軍節度使沙彥珣為右神武統軍秋七月丙申石敬瑭
奏斬挾馬都指揮使李暉等三十六人以謀亂故也時
敬瑭以兵屯忻州一日軍士喧譟遽呼萬歲乃斬暉等
以止之

契丹國志契丹屢攻北邊時石敬瑭將大兵屯忻州潞王遣使賜軍士夏衣傳詔撫諭軍士呼

萬歲者數四敬瑭懼幕僚段希堯請誅其倡者敬瑭命劉知遠斬三十六人以殉潞王聞益疑之

御史

中丞盧損奏準天成二年七月勅每月首十五日閣罷
五日起居臣以為中旬排仗有勞聖躬請只以月首入
閣五日起居依舊又準天成三年五月長興二年七月
勅許諸州節度使帶使相歲薦寮屬五人餘薦三人防
禦團練使薦二人今乞行釐革又長興二年八月勅州
縣佐官差充馬步判官仍同一任乞行止絕依舊衙前
選補詔曰今後藩臣帶使相許薦三人餘薦二人直屬
京防禦團練使薦一人餘並從之丁酉迴紇可汗仁美

遣使貢方物西京弓弩指揮使任漢權奏六月二十一日與川軍戰于金州之漢陰王師不利其部下兵士除傷瘐外已至鳳翔先是盩厔鎮將劉贊引軍入川界為蜀將全師郁所敗金州都監崔處訥重傷諸州屯兵潰散金州防禦使馬全節收合州兵固守獲全以樞密使劉延皓為天雄軍節度使甲辰以右神武統軍沙彥珣權知雲州乙巳以徐州節度使張敬達充北面行營副總管時契丹入邊石敬瑭屢請益兵朝廷軍士多在北

鄙俄聞忻州諸軍呼譟帝不悅乃命敬達為北軍之副以減敬瑭之權也丁巳宰臣盧文紀等上疏其畧曰臣近蒙召對面奉天旨凡軍國大事利害可否卿等合盡言者臣等謬處臺衡奉行制勅但緣事理互有區分軍戎不在于職司錢穀非關於局分苟陳異見卽類侵官況才不濟時識非經遠因五日起居之例于兩班旅見之時略獲對敎兼承顧問衛士周環于階陛庶臣羅列于殿庭四面聚觀十手所指臣等苟欲各伸愚短此時

安敢敷陳韓非昔懼于說難孟子亦憂于言責臣竊奉
本朝政事肅宗初平寇難再復寰瀛頗經涉于艱難尤
勤勞于委任每正衙奏事則泛咨訪于羣臣及便殿詢
謀則獨對敷于四輔自上元年後于長安東內置延英
殿宰臣如有奏議聖旨或有特宣皆于前一日上聞對
御之時祇奉冕旒旁無侍衛獻可替否得曲盡于討論
捨短從長故無虞于漏洩君臣之際情理坦然伏望聖
慈俯循故事或有事關軍國謀繫否臧未果決于聖懷

要詢訪于臣輩則請依延英故事前一日傳宣或臣等有所聽聞切關利害難形文字須面敷敷臣等亦依故事前一日請開延英當君臣奏議之時祇請機要臣寮侍立左右兼乞稍霽威嚴恕臣荒拙雖乏鷹鷂之効庶盡葵藿之心詔曰卿等濟代英才鎮時碩德或締構于興王之日或經綸于繼聖之時鹽梅之任俱崇藥石之言並切請復延英之制以伸議政日規而況列聖遺芳皇朝盛事載詳徵引良切歎嘉恭惟五日起居先皇垂

範侯百寮之俱退召四輔以獨昇接以溫顏詢其理道
計此時作事之意亦昔日延英之流朕叨獲嗣承切思
遵守將成其美不爽兼行其五日起居仍令仍舊尋常
公事亦可便舉奏聞或事屬機宜理當秘密量事繁慢
不限隔日及當日便可于閣門祇候且膀子奏聞請面
敷敷卽當盡屏侍臣端居便殿佇聞高議以慰虛懷朕
或要見卿時亦令當時宣召但能務致理之實何必拘
延英之名有事足可以討論有言足可以陳述宜以沃

心為務勿以逆耳為虞勉罄謀猷以裨寡昧帝性仁恕
聽納不倦嘗因朝會謂盧文紀等曰朕在藩時人說唐
代為人主端拱而天下治蓋以外恃將校內倚謀臣故
端拱而事辦朕荷先朝鴻業卿等先朝舊臣每一相見
除承奉外畧無社稷大計一言相救坐視朕之寡昧其
如宗社何文紀等引咎致謝因奏延英故事故有是詔
八月庚午滑州節度使高久韜卒壬申以右衛上將軍
王景戡為左衛上將軍以右神武統軍婁繼英為右衛

上將軍已卯以西上閤門使行少府少監兼通事舍人
蘇繼顏為司農卿職如故辛巳以權知雲州右神武統
軍沙彥珣為雲州節度使鄴都殺人賊陳延嗣并母妹
妻等并棄市延嗣父子相承與其妹妻于諸州郡誘人
殺之而奪其財前後被殺者數百人至是事泄而誅之
癸未以前潞州行軍司馬陳玄為將作監以玄善醫故
有是命丁亥以洺州團練使李彥舜為義武軍節度使
檢校太傅太原秦達鞞部族于靈丘安置己丑以太子

少保致仕戴思遠卒廢朝庚寅以前兗州節度使楊漢章為左神武統軍以前邢州節度使康思立為右神武統軍潞州奏前雲州節度使安重霸卒九月己亥以河陽節度使侍衛馬軍都指揮使安從進為襄州節度使以襄州節度使趙在禮為宋州節度使癸卯以忠正軍節度使侍衛步軍都指揮使宋審虔為河陽節度使典軍如故己酉禮部貢院奏進士請夜試童子衣舊表薦重置明算道舉舉人落第後別取文解五科試紙不用

中書印用本司印並從之以宣徽南院使房暉為刑部
尚書充樞密使以宣徽北院使充樞密副使劉延朗為
宣徽南院使充樞密副使丙辰以左僕射李愚卒廢朝
冬十月丁卯幸崇道宮甘泉亭己巳以左衛上將軍李
頊為左領軍上將軍北面行營總管石敬瑭奏自代州
歸鎮庚午以晉州節度使張溫卒廢朝甲戌幸趙延壽
張延朗等丁丑以端明殿學士兵部侍郎李專美為秘
書監充宣徽北院使庚寅以左諫議大夫唐訥為左散

騎常侍十一月庚子以左驍衛上將軍郝瓊為左金吾
上將軍以光祿卿王玟為太子賓客以徐州節度使張
敬達為晉州節度使依前充大同振武威塞彰國等軍
兵馬副總管丁未以秘書少監丁濟為太子詹事乙卯

以前金州防禦使馬全節為滄州畱後

通鑑劉延朗欲
羣議弗騰帝聞

之渤海國遣使朝貢十二月戊辰禁用鉛錢壬申以中
書侍郎兼兵部尚書充樞密使韓昭胤為檢校司空同
平章事充河中節度使甲戌以宗正少卿李延祚為將

作監致仕丁丑故武安軍州節度使累贈太傅劉建峯
贈太尉從湖南之請也戊寅太常奏來年正月一日上
辛祀昊天上帝于圓丘依禮大祠不朝詔曰祀事在質
明前儀仗在日出後事不相妨宜依常年受朝壬午以
翰林學士承旨戶部侍郎程遂為兵部侍郎翰林學士
工部侍郎崔沔為戶部侍郎翰林學士中書舍人和凝
為工部侍郎並依前充職乙酉以前祕書監楊凝式為
兵部侍郎己丑以前同州節度使馮道為司空以尚書

右僕射劉昫為左僕射以太子少師盧質為左僕射以
兵部侍郎馬縚兼國子祭酒

舊五代史卷四十七

舊五代史卷四十七攷證

唐末帝紀中枉耗國力 枉耗通鑑注引薛史作枉費
攷冊府元龜亦作枉耗今仍其舊

辛卯以宣徽南院使劉延皓為刑部尚書充樞密使
案劉延皓充樞密使歐陽史作五月與是書繫四月
異通鑑從是書

侍衛步軍都指揮使宋審虔 宋審虔原本脫虔字今
據通鑑增入

渤海國遣使朝貢 案歐陽史作九月乙卯渤海遣使
者來五代會要作十二月渤海遣使列周卿等入朝貢
方物俱與是書作十一月異

翰林學士干部侍郎崔棹 崔棹原本訛崔櫓今據歐

陽史改正

舊五代史卷四十七考證

欽定四庫全書

史部

舊五代史卷

四十八至
五十三

詳校官編修臣黃壽齡

洗馬臣王坦修覆勘

總校官編修臣朱鈐

校對官中書臣吳翼成

謄錄監生臣譚湘鏡

欽定四庫全書

舊五代史卷四十八

宋門下侍郎參知政事監修國史薛居正等撰

唐書第二十四

宋帝紀下

清泰三年春正月辛卯朔帝御文明殿受朝賀仗衛如式乙未百濟遣使獻方物戊戌幸龍門佛寺祈雪癸卯以給事中充樞密院直學士呂琦為端明殿學士以六

軍諸衛判官尚書工部郎中薛文遇為樞密院直學士
乙巳以上元夜京城張燈帝微行置酒于趙延壽之第
丁未皇子河南尹判六軍諸衛事重美封雍王己未以
前司農卿王彥鎔為太僕卿二月戊辰吐渾寧朔兩軍
留後李可久加檢校司徒可久本姓白氏前朝賜姓庚
子監修國史姚顗史官張昭遠李祥吳承範等修撰明
宗實錄三十卷上之

五代會要同修撰官中書舍人張昭遠李祥直館左拾遺吳承範左

拾遺揚昭儉等各頒賚有差

以大理卿竇維為光祿卿以前許州節

度判官張登為大理卿丁丑以太常卿李鱗為兵部尚書以兵部尚書梁文矩為太常卿庚辰以前鄜州節度使皇甫立為潞州節度使辛巳以前均州刺史仇暉為左威衛上將軍保順軍節度使鮑君福加檢校太尉同平章事丁亥以昭義節度使安元信卒廢朝三月庚子中書門下奏準閣門分析內外官辭見謝規例請州判官軍將進奉到闕舊例門見門辭今後只令朝見依舊門辭新除諸道判官書記以下無例中謝並放謝放辭

得替到京無例見今後兩使判官許中謝赴任即門辭
其書記以下並依舊例朝臣文五品武四品以上舊例
中謝止以下無例對謝令請依天成四年正月勅凡升
朝官並許中謝諸道都押衙馬步都指揮虞候鎮將諸
色場院無例謝辭並進膀子放謝放辭得替到闕無例
入見在京鹽麴稅官兩宮巡即許中謝新徐令錄並中
謝次日門辭兼有口勅誠勵文武兩班所差弔祭使及
告廟祠祭只正衙辭不赴內殿諸道進奏官到闕見併

假進膳于門辭從之辛丑權知福建節度使王昶奏節度使王延鈞以去年十月十四日卒是時延鈞父子雖僭竊于閩嶺猶稱藩於朝廷故有是奏甲辰以右神武

統軍楊漢章為彰武軍節度使丙午以翰林學士禮部

侍郎馬胤孫為中書侍郎同平章事丁巳以端明殿學

士呂琦為御史中丞

案通鑑呂琦與李崧建和親契丹之策為薛文遇所沮改為御史中

丞蓋疎之也

戊午御史中丞盧損責授右贊善大夫知雜侍

御史韋稅責授太僕寺丞侍御史魏遜責授太府寺主

簿侍御史王岳責授司農寺主簿初延州保安鎮將白
文審聞兵興岐下專殺郡人趙思謙等十餘人已伏其
罪復下臺追繫推鞠未竟會去年五月十二日德音除
十惡五逆放大殺人外並放盧損輕易即破械釋文審
帝大怒收文審誅之臺司稱奉德音釋放不得追領祇
證中書詰云德音言不在追窮枝蔓無不得追領祇證
六字擅改勅語大理斷以失出罪人論故有是命是月
有蛇鼠鬪于師子門外鼠生而蛇死夏四月己未朔以

左衛上將軍王景戡為左神武統軍以右領軍上將軍
李頌為華清宮使戊辰以太子詹事盧演為工部尚書
致仕辛未以中書舍人史館修撰張昭遠為禮部侍郎
以前滄州節度使李金全為右領軍上將軍是月有熊
入京城搏人五月辛卯以河東節度使兼大同彰國振
武威塞等軍蕃漢馬步總管檢校太師兼中書令駙馬
都尉石敬瑭為鄆州節度使進封趙國公以河陽節度
使充侍衛馬步軍都指揮使宋審虔為河東節度使甲

午以前晉州節度使大同彰國振武威塞等軍蕃漢副
總管張敬達充西北面蕃漢馬步都部署落副總管乙
未詔諸州兩使判官畿赤令有關取省郎遺補丞博少
列官寮選擇擢任以忠正軍節度使侍衛步軍都指揮
使張彥琪為河陽節度使充侍衛馬軍都指揮使以彰
聖都指揮使饒州刺史符彥饒為忠正軍節度使充侍
衛步軍都指揮使丙申以雍王重美與汴州節度使范
延光結婚詔兗王從溫主之丁酉以國子祭酒馬縞卒

廢朝戊戌昭儀秦河東節度使石敬瑭叛以鴻臚卿兼
通事舍人判四方館王景崇為衛尉卿充引進使壬寅
削奪石敬瑭官爵便令張敬達進軍攻討乙卯以晉州
節度使張敬達為太原四面兵馬都部署尋改為招討
使以河陽節度使侍衛馬軍都指揮使張彥琪為太原
四面馬步軍都指揮使以邢州節度使安審琦為太原
四面馬軍都指揮使以陝州節度使相里金為太原四
面步軍都指揮使以右監門上將軍武廷翰為壕寨使

丙辰以定州節度使楊光遠為太原四面兵馬副部署
兼馬步都虞候尋改為太原四面副招討使都虞候如
故以前彰武軍節度使高行周為太原四面招撫兼排
陣使初帝疑河東有異志與近臣語及其事帝曰石郎
與朕近親在不疑之地流年毀譽朕心自明萬一失歡
如何和解左右皆不對翼日欲移石敬瑭于鄆州房嵩
等堅言不可司天監趙延久亦言星辰失度尤宜安靜
由是稍緩其事會薛文遇獨宿于禁中帝召之諭以太

原之事文遇奏曰臣聞作舍于道三年不成國家利害
斷自宸旨以臣料之石敬瑭除亦叛不除亦叛不如先
事圖之帝喜曰聞卿此言豁吾憤氣先是有人言國家
明年合得一賢佐主謀平定天下帝意亦疑賢佐者屬
在文遇即令手書除日子夜下學士院草制翼日宣制
之際兩班失色居六七日敬瑭上章云明宗社稷陛下
纂承未契輿情宜推令辟許王先朝血緒養德皇闡儻
循當璧之言免負闕牆之議帝覽奏不悅手攘抵地召

馬盾孫草詔報曰父有社稷傳之於子君有禍難倚之於親卿于鄂王故非疏遠往歲衛州之事天下皆知今朝許王之言人誰肯信英賢立事安肯如斯云戊申張敬達奏西北面先鋒都指揮使安審信率雄義左第二指揮二百二十七騎並部下共五百騎剽劫百井叛入太原又奏大軍已至太原城下詔安審信及雄義兵士妻男並處斬家產沒官先是雄義都在伏州屯戍其指揮使安元信謀殺伏州刺史張朗事洩戍兵自潰奔安

審信軍審信與之入太原太常奏于河南府東權立宣
憲太后寢宮徙之己酉振武節度使安叔千奏西北界
巡檢使安重榮驅掠戍兵五百騎叛入太原以新授河
東節度使宋審虔為宣州節度使充侍衛馬軍都指揮
使壬子鄴都屯駐捧聖都虞候張令昭逐節度使劉延
皓據城叛翌日令昭召副使邊仁嗣已下逼令奏請節
旄六月辛酉天雄軍節度使劉延皓削奪官爵勒歸私
第癸亥以天雄軍守禦右捧聖第二軍都虞候張令昭

為檢校司空行右千牛將軍權知天雄軍府事丙寅御
敷政殿遣工部尚書崔居儉奉宣憲皇太后寶冊於寢
宮時陵園在河東適會兵興故權於京城修奉寢宮上
謚焉己巳以西上閣門副使少府監兼通事舍人劉頎
為鴻臚卿職如故庚午詔曰時雨稍愆頗傷農稼分命
朝臣祈禱辛未工部尚書致仕許寂卒以權知魏府事
右千牛將軍張令昭為齊州防禦使以捧聖右第三指
揮使邢立為德州刺史以捧聖第五指揮使康福進為

鄴州刺史甲戌以汴州節度使范延光為天雄軍四面
招討使知行府事丙子以西京留守李周為天雄軍四
面副招討使兼兵馬都監詔河東將佐節度判官趙瑩
以下十四人並籍沒家產秋七月戊子范延光奏領軍
至鄴都攻城次己丑誅右衛上將軍石重英皇城副使
石重裔皆敬瑭之子也時重英等匿於民家井中獲而
誅之并族所匿之家奚首領達喇罕遣通事介老奏奚
王李素姑謀叛入契丹已處斬訖達喇罕權知本部落

事辛卯沂州秦誅都指揮使石敬瑭并族其家敬瑭之弟也乙未以前彰武軍節度使高行周為潞州節度使充太原四面招撫排陣使以潞州節度使皇甫立為華州節度使丁酉雲州節度使沙彥珣奏此月二日夜步軍指揮使桑遷作亂以兵圍于城彥珣突圍出城就西山據雷公口三日招集兵士入城誅亂軍軍城如故辛丑以將作監丞介國公宇文頡為汝州襄城令乙巳以衛尉卿聶延祚為太子賓客戊申范延光奏此月二十

一日收復鄴都羣臣稱賀己酉以禮部侍郎張昭遠為御史中丞以御史中丞呂琦為禮部侍郎充端明殿學士庚戌中書奏劉延皓賓佐等帥臣既已削奪其行軍司馬李延筠副使邊仁嗣以下望命放歸田里奏入帝大怒詔大理曰帥臣失守已行削奪其寮佐合當何罪既而竟依中書所奏壬子詔范延光誅張令昭部下五指揮及忠銳忠肅兩指揮繼范延光奏追兵遣襲張令昭部下敗兵至邢州沙河斬首三百級并獻張令昭邢

立李貴等首級又奏獲張令昭同惡捧聖指揮使米全
以下諸指揮使都頭凡十三人並磔于府門癸丑左衛
上將軍仇暉卒洺州奏擒獲魏府作亂捧聖指揮使馬
彥柔以下五十八人邢磁州相次擒獲亂兵並送京師
彰聖指揮使張萬迪以部下五百騎叛入太原詔誅家
屬于懷州本營八月戊午契丹遣使摩哩入朝己未以
汴州節度使范延光為天雄軍節度使守太傅兼中書
令以西京留守李周為汴州節度使檢校太尉同平章

事癸亥應州奏契丹三千騎迫城詔端明殿學士呂琦
往河東忻代諸屯戍所犒軍以左龍武大將軍袁義為
右監門上將軍以振武軍節度使安叔干充代北兵馬
都部署己巳雲州沙彥珣奏供奉官李讓勲送夏衣到
州縱酒浚轍軍都行刼殺兵馬都監張思殷都指揮使
党行進其李讓勲已處斬訖張敬達奏遣五龍橋攻太
原城次戊寅以鎮州節度使董溫琪充東北面副招討
使己卯洺州獻野蠶二十斤辛巳張敬達奏賊城內出

騎軍三十隊步卒三十人衝長連城高行周襲殺入壕溺死者大半擒賊將安小喜以下百餘人甲馬一百八十匹九月甲辰張敬達奏此月十五日與契丹戰于太原城下王師敗績時契丹王自率部族來援太原高行周符彥卿率左右廂騎軍出鬪蕃軍引退已時後蕃軍復成列張敬達楊光遠安審琦等陣於賊城西北倚山橫陣諸將奮擊蕃軍屢卻至晡我騎軍將移陣蕃軍如山而進王師大敗投兵仗相藉而死者山積是夕收合

餘衆保于晉祠南晉安寨蕃軍塹而圍之自是音聞阻
絕朝廷大恐是日遣侍衛步軍都指揮使符彥饒率兵
屯河陽詔范延光率兵由青山路趨榆次詔幽州趙德
鈞由飛狐路出敵軍後輝州防禦使潘環合防戍軍出
磁隰以援張敬達以前絳州刺史韓彥暉為太子賓客
契丹王移帳於柳林乙巳詔取二十二日幸北面軍前
戊申帝發京師路經徽陵帝親行謁奠夕次河陽召羣
臣議進取盧文紀勸帝駐河橋庚戌樞密使趙延壽先

赴潞州辛亥辛懷州召吏部侍郎龍敏訪以機事敏勸
帝立東丹王贊華為契丹主以兵援送入蕃則契丹王
有後顧之患不能久駐漢地矣帝深以為然竟不行其

謀

遼史義宗傳云倍雖在異國常思其親問安之使不絕後明宗養子從珂弒其君自立倍密報太宗曰從

珂弒君盡討之是東丹王寶啟兵端唐帝自是酣飲悲
君臣或知其陰謀故龍敏之說不行

歌形神慘沮臣下勸其親征則曰卿輩勿說石郎使我
心膽墮地其怯憊也如此冬十月丁巳夜彗星出虛危
長尺餘壬戌詔天下括馬又詔民十戶出兵一人罷甲

自備

契丹國志唐發民為兵每七戶出征夫一人自備雖仗謂之義軍凡得馬二千餘匹征夫五千人民

間大

戊辰代州刺史張朗超授檢校太保以其屢殺敵

衆故以是命獎之癸酉幽州趙德鈞以本軍三千騎與鎮州董溫琪由吳兒谷趨潞州十一月戊子以趙德鈞為諸道行營都統以趙延壽為河東道南面行營招討使以劉延朗副之庚寅以范延光為河東道東南面行營招討使以李周副之帝以呂琦嘗佐幽州幕乃命貴都統官告以賜德鈞兼犒軍士琦至從容宣帝委任之

意德鈞曰既以兵相委焉敢惜死德鈞志在併范延光
軍奏請與延光會合帝以詔諭延光延光不從丁酉延
州上言節度使楊漢章為部衆所殺以前坊州刺史劉
景嚴為延州留後庚子趙德鈞奏大軍至團柏谷前鋒
殺蕃軍五百騎范延光奏軍至榆次蕃軍退入河東川
界潘環奏隰州逐退蕃軍壬寅趙德鈞奏軍出谷口蕃
軍漸退契丹王見駐柳林砦時德鈞累奏乞授延壽鎮
州節制帝怒曰德鈞父子堅要鎮州苟能逐退蕃戎要

代予位亦甘心矣若翫寇要君但恐犬兔俱斃德鈞聞之不悅閏月丙辰日南至羣臣稱賀于行宮帝曰晉安寨內將士應思家國矣因泣下久之丁巳以奇嵐軍為勝州辛酉以右龍武統軍李從昶為左龍武統軍以前邠州節度使楊思權為右龍武統軍壬戌丹州刺史康承詢停任配流鄧州時承詢奉詔率義軍赴延州義軍亂承詢奔邠州故有是責甲子太原行營副招討使楊光遠殺招討使張敬達于晉安寨以兵降契丹時契丹

圍寨自十一月以後芻糧乏絕軍士毀居屋茅淘馬糞
削松栴以供餼飼馬尾鬣相食俱盡楊光遠謂敬達曰
少時人馬俱盡不如奮命血戰十得三四猶勝坐受其
弊敬達曰更少待之一日光遠伺敬達無備遂殺之與
諸將同降契丹時馬猶有五千匹戎王並以漢軍與石
敬瑭其馬及甲仗即賫驅出塞丁卯戎王立石敬瑭為
大晉皇帝約為父子之國改元為天福戎王與晉高祖
南行趙德鈞父子與諸將自團柏谷南奔王師為蕃騎

所蹙投戈棄甲自相騰踐擠于巖谷者不可勝紀己巳
帝聞晉安寨為敵所陷詔移幸河陽時議以魏府軍尚
全戎王必憚山東未敢南下車駕可幸鄴城帝以李崧
與范延光相善召入謀之薛文遇不知而繼至帝變色
崧躡文遇足乃出帝曰我見此物肉鸛適擬抽刀刺之
崧曰文遇小人致誤大事刺之益醜崧因請帝歸京壬
申車駕至河陽甲戌晉高祖與戎王至潞州戎王遣蕃
將大詳袞率五千騎送晉高祖南行丁丑車駕至自河

陽時左右勸帝固守河陽居數日符彥饒張彥琪至奏
帝不可城守是日晚至東上門小黃門鳴鞘於路索然
無聲已卯帝遣馬軍都指揮使宋審虔率千餘騎至白
馬阪言踏陳地時諸將謂審虔曰何地不堪交戰誰人
肯立于此審虔乃請帝還宮庚辰晉高祖至河陽辛巳
辰時帝舉族與皇太后曹氏自燔于玄武樓晉高祖入
洛得帝燼骨于火中來年三月詔葬于徽陵之封中帝
在位二年年五十二

五代史闕文晉高祖引契丹圍晉
安寨降楊光遠清泰帝至自覃懷

京師父老迎帝於上東門外帝垂泣不止父老奏曰臣等伏聞前唐時中國有難帝王多幸蜀以圖進取陛下何不且入西川帝曰本朝西川節度使皆用文臣所以玄宗僖宗避寇幸蜀今孟氏已稱尊矣吾何歸乎因慟哭入內舉族自焚

史臣曰末帝負神武之才有人君之量由尋戈而踐阼慙德應深及當宁以居尊政經未失屬天命不祐人謀匪臧坐俟焚如良可悲矣稽夫枉金甲于河壩之際斧眇樓于梁壘之時出沒如神何其勇也及乎駐革輅于覃懷之日絕羽書于汾晉之宸涕淚霑襟何其怯也是

知時之來也雕虎可以生風運之去也應龍不免為醢
則項藉悲歌于帳下信不虛矣

舊五代史卷四十八

舊五代史卷四十八攷證

唐末帝紀下五月辛卯以河東節度使兼大同彰國振
武威塞等軍蕃漢馬步總管檢校太師兼中書令駙
馬都尉石敬瑭為鄆州節度使進封趙國公 案歐
陽史廢帝紀以五月以前即書石敬瑭反與晉本紀
自相矛盾據是書五月辛卯始移敬瑭于鄆州戊戌
始聞拒命也五代春秋通鑑俱與是書同

戊戌昭義奏河東節度使石敬瑭叛 案通鑑作昭義

節度使皇甫立奏石敬瑭叛

乙卯以晉州節度使張敬達為太原四面兵馬都部署
尋改為招討使 案通鑑乙巳以張敬達兼太原四
面排陣使丙午以為太原四面都部署丁未又知太
原行府事不言其為招討使歐陽史又作都招討使
與是書微異

捧聖第五指揮使康福進 康福進疑當作康福據冊
府元龜引薛史亦作康福令姑仍其舊

誅右衛上將軍石重英皇城副使石重裔皆敬瑄之子也
案重英通鑑作重殷又通鑑考異引廢帝實錄作侄男尚食使重又供奉官重英並與是書不同

九月甲辰張敬達奏此月十五日與契丹戰于太原城下
案張敬達及契丹戰于太原是書晉紀作辛丑盖辛丑日戰越四日甲辰乃奏到也通鑑亦作辛丑
遼史作庚午與是書異歐陽史作甲辰戰于太原殊誤

詔范延光率兵由青山路趨榆次 范延光遼史避太

宗諱作范延廣

甲子太原行營副招討使楊光遠殺招討使張敬達於
晉安寨以兵降契丹 案楊光遠降契丹歐陽史通
鑑俱作閏十一月甲子五代春秋作十一月誤

戎王並以漢軍與石敬瑭其馬及甲仗即賚驅出塞

案遼史云所降軍士及馬五千匹以賜晉帝與是書

異通鑑從是書

丁卯戌王立石敬瑭為大晉皇帝 案契丹立晉是書
晉高祖紀作十一月丁酉此紀作閏月丁卯前後互
異據通鑑考異引廢帝實錄亦作丁卯蓋契丹立晉
在十一月丁酉唐人至閏十一月丁卯始奏聞也實錄
誤以奏聞之日為立晉之日是書唐紀亦仍其誤
達喇罕舊作達刺干今改 摩哩舊作梅里今改 大
詳衮舊作大相溫今改

舊五代史卷四十八攷證

欽定四庫全書

舊五代史卷四十九

宋門下侍郎參知政事監修國史薛居正等撰

唐書第二十五

后妃列傳一

武皇帝貞簡皇后曹氏莊宗之母也太原人以良家子
嬪于武皇姿質閒麗性謙退而明辨雅為秦國夫人所
重常從容謂武皇曰妾觀曹姬非常婦人王其厚待之

武皇多內寵乾寧初平燕薊得李匡儔妻張氏姿色絕代嬖幸無雙時姬侍盈室罕得進御唯太后思顧不衰武皇性嚴急左右有過必峻于謹罰無敢言者唯太后從容救解卽為解顏及莊宗載誕體貌奇傑武皇異而憐之太后益寵貴諸夫人咸出其下后亦恭勤內助左右稱之武皇薨莊宗嗣晉王位時李克寧李存勗謀變人情危懼太后召監軍張承業指莊宗謂之曰先人把臂授公此兒如聞外謀欲孤付託公等但置予母子有

地母令乞食于沛幸矣承業因誅存顯克寧以清內難
莊宗善音律喜伶人謔浪太后嘗提耳誨之天祐七年
鎮定求援莊宗促命治兵太后曰予齒漸衰兒但不墜
先人之業為幸矣何事櫛風沐雨離我晨昏莊宗曰稟
先王遺旨須滅仇讐山東之事機不可失及發太后餞
于汾橋悲不自勝莊宗平定趙魏駐于鄴城每一歲之
內馳駕歸寧者數四民士服其仁孝太后初封晉國夫
人莊宗即位命宰臣盧損奉冊書上皇太后尊號其年

平定河南西幸洛陽令皇弟存渥皇子繼岌就太原迎奉莊宗親至懷州迎歸長壽宮太后素與劉太妃善分訣之後悵然不樂俄聞太妃寢疾尚醫中使問訊結徹既而謂莊宗曰吾與太妃恩如伯仲彼經年抱疾但見吾面差足慰心吾暫至晉陽旬朔與之俱來莊宗曰時方暑毒山路崎嶇無煩往復可令存渥輩迎侍太妃乃止及凶問至太后慟哭累旬由是不豫尋崩于長壽宮
同光三年冬十月上謚曰貞簡皇太后葬于壽安陵

太妃劉氏武皇之正室也

案劉太妃傳原本闕佚攷北夢瑣言云晉王李克用妻劉

夫人常隨軍行至軍機多所宏益先是汴州上源驛有變晉王憤恨欲回軍攻之夫人曰公為國討賊而可以論列于是班退天復中周德威為汴軍所敗三軍潰散汴軍乘我晉王危懼與李存信議欲出保雲州夫人曰存信本北方牧羊兒也焉知成敗王常笑王行瑜棄城失勢被人屠割今復欲效之何也王頃歲避難塞外幾遭陷害賴遇朝廷多事方得復歸今一旦出城使有不測之變焉能遠及晉王止行居數日亡散之士復集軍城安定夫人之力也五代會要云同光元年四月冊為皇太妃歐陽史云莊宗即位冊尊曹氏為皇太后而以嫡母劉氏為皇太妃太妃性謝太后太后有慚色太妃曰願吾兒享國無窮使吾獲沒于地以從先君幸矣復何言哉莊宗滅梁入洛使人迎太后歸洛居長壽

宮而太妃獨留晉陽同
光三年五月太妃薨

魏國夫人陳氏襄州人本昭宗之宮嬪也乾寧二年武
皇奉詔討王行瑜駐軍于渭北昭宗降朱書御札出陳
氏及內妓四人以賜武皇陳氏素知書有才貌武皇深
加寵重及光化之後時事多艱武皇常獨居深念嬪媵
鮮得侍謁唯陳氏得名見陳氏性既靜退不以寵侍自
侈武皇常呼為阿嬌及武皇大漸之際陳氏侍醫藥垂
泣言妾為王執掃除之役十有四年矣王萬一不幸妾

將何託既不能以身為殉願落髮為尼為王讀一藏佛
經以報平昔武皇為之流泣及武皇薨陳氏果落髮持
經法名智願後居于洛陽佛寺莊宗賜號建法大師天
成中明宗幸其院改賜圓惠大師晉天福中卒於太原
追諡光國大師塔以惠寂為名也

莊宗神閔敬皇后劉氏

案劉后傳原本闕佚攷北夢瑣
言云莊宗劉皇后魏州成安人

家世寒微太祖攻魏州取成安得后時年五六歲歸晉
陽宮為太后侍者教吹笙及箏姿色絕衆聲伎亦所長
太后賜莊宗為韓周夫人侍者後誕皇子繼位寵待日
隆他日成安人劉史詣鄴宮見上稱夫人之父有內臣

欽定四庫全書

卷四十九

劉建豐認之即昔日黃鬚丈人后之父也劉氏方與嫡夫人爭寵皆以門族誇尚劉氏耻為寒家白莊宗曰妾去御之時妾父死于亂兵是時環屍而哭妾固無父是何田舍翁詐偽及此乃于宮門答之其實后即史之長女也莊宗好俳優宮中暇日自負著囊蕪篋令繼岌相隨以后父劉史以醫卜為業也后方晝眠及造其卧内自稱劉衙推訪女后大恚答繼岌然為太后不禮復以韓夫人居正無以發明大臣希旨請冊劉氏為皇后議者以后出于寒賤好興利聚財初在鄴宮令人設法稗販所驚然蕪菜茹亦以皇后為名正位之後凡貢奉先入後宮惟寫佛經施尼師他無所賜闕下諸軍困乏以至妻子餓殍宰相請出内庫依給后將出粧具銀盆兩口皇子滿喜等三人令鬻以贍軍一旦作亂亡國滅族與夫褒姒妲己無已也先是莊宗自為俳優名曰李天下雜于塗粉優雜之間時為諸優扑扶摑搭竟為罵婦恩伶之傾玷有國者得不以為前鑒劉后以囊蕪金合

犀帶四欲于太原造寺為尼沿路復通皇弟存渥同養而寢明宗聞其穢即令自殺攷歐陽史作裨將袁建豐得后納之晉宮而北夢瑣言作內臣劉建豐亦傳聞之異辭也

淑妃韓氏莊宗正室

案韓淑妃傳原本闕佚攷五代會要云同光二年十二月冊以宰臣

豆盧革韋說為冊使出應天門登輅車南薄鼓吹前導至永福門降車入右銀臺門至淑妃宮受冊于內文武

百官立班稱賀

德妃伊氏莊宗次室

案伊德妃傳原本闕佚攷北夢瑣言云莊宗皇帝嫡夫人韓氏後為

淑妃伊氏為德妃又言夫人夏氏後嫁李贊華所謂東丹王即按已堅長子性酷毒侍婢微遇即以刀割火灼夏氏少長宮掖不忍其山求離婦歸河陽節度使夏魯奇家後為尼也歐陽史家人傳明宗立悉放莊宗時宮

人號國夫人夏氏歸夏魯奇家後嫁李贊華與北夢瑣
言徵異遼史又以夏氏為莊宗皇后疑誤又案五代
會要莊宗朝內職又有昭義侯氏封沂國夫人昭媛白
氏封沂國夫人出使美宣鄧氏封魏國夫人御正楚真
張氏封涼國夫人司簿德美周氏封宋國夫人侍真吳
氏封延陵郡夫人懿才王氏封太原郡夫人咸一韓氏
封昌黎郡夫人瑤芳張氏封清河郡夫人懿德王氏封
瑯琊郡夫人宣一馬氏封扶風郡夫人並同光二年十
一月
勅

明宗昭懿皇后夏氏生秦王從榮及閔帝同光初后以
疾崩明帝即位追封為晉國夫人長興中明宗以秦宗
二王位望既隆因思從貴之義乃下制曰故晉國夫人

夏氏素推仁德久睦宗親嘗施內助之方不見中興之
盛予當御極子並為王有鵲巢之高無翬衣之貴貞魂
永逝懿範常存考本朝之文沿追冊之制將慰懷于九
族冀叶慶于四星宜追冊為皇后兼定懿號既有司
上諡曰昭懿

和武顯皇后曹氏

案曹后傳原本闕佚攷五代會要云
天成三年正月冊為淑妃長興元年

正月十四日冊為皇后應順元年正月冊為皇太后至
清泰三年閏十一月隨末帝崩于後樓晉高祖使人護
葬至天福五年正月二十
八日追冊曰和武顯皇后

宣憲皇后魏氏

案魏后傳原本闕佚據通鑑考異引唐廢帝實錄云宣憲皇后魏氏鎮州平山

人中和未明宗徇地山東留成平山得魏后又云明宗為裨將性濶達不能治生曹后亦疎于畫畧生計所資惟宣憲而已五代會要云初封魯國太夫人清泰二年二月中書門下奏臣聞漢昭帝承祚御歷泰尊諡于雲陽魏明帝繼體守文思外家于甄館而皆追從徽號祔饗廟庭克隆敬本之文式叶愛親之道臣等又覽國史竊見玄宗皇帝母曰昭成皇后竇氏代宗皇帝母曰章敬太后吳氏始嬪朱邨俄闕玄宮鴻圖既屬于明君尊號咸追于聖母伏以魯國夫人發祥沙麓貽慶河洲三后最賢周母先成于天統四妃有子唐宮先啟于帝基仰惟當宁之情彌軫寒泉之思久虛殷薦慮損皇猷臣等謹上尊諡曰宣憲皇太后請依昭成皇太后故事擇日備禮冊命又臣等伏聞先太后舊陵永祔先祠則都下難崇別廟既追尊諡合初闕宮按漢朝故事園寢不

在王畿或就寢所便立寢祠今商量上謚後權立同廟
以申告獻配祀之禮請俟他年從之據歐陽史云議建
陵寢而太康石敬瑭反乃于京師河南府東立寢宮
又案五代會要所載明宗時內職德妃王氏天成三年
正月冊立長興二年四月進號淑妃應順元年正月十
三日冊為太妃至周廣順元年四月追謚賢妃昭儀王
氏封齊國夫人昭容葛氏封周國夫人昭媛劉氏封趙
國夫人孫氏封楚國夫人御正張氏封曹國夫人司寶
郭氏封魏國夫人司贊于氏封鄭國夫人尚服王氏封
衛國夫人司記崔氏封蔡國夫人司膳翟氏封滕國夫
人司醢吳氏封莒國夫人媵好高氏封渤海郡夫人美
人沈氏封太原郡夫人順御朱氏封吳郡夫人司飾聊
氏封潁川郡夫人司衣劉氏封彭城郡夫人司藥孟氏
封咸陽郡夫人梳篋張氏封清河郡夫人司服王氏封
太原郡夫人櫛篋傅氏封潁川郡夫人司容張氏賜號
尚書故江氏追封濟陽郡夫人以上皆長興三年九月

勅其名號皆中書門下按六典內職仿而行之內人李氏封隴西縣君崔氏封清河縣君李氏封成紀縣君田氏封咸陽縣君白氏封南陽縣君並長興四年二月勅前代內職皆無封君之禮此一時之制

閔帝哀皇后孔氏

葉孔后傳原本闕佚據通鑑云孔循陰遣人結王德妃求納其女德妃請

娶循女為從厚妃帝許之庚寅皇子從厚納孔循女為妃五代會要云初封魯國夫人應順元年四月為末帝所害晉天福五年正月二十八日追諡為哀皇后

末帝劉皇后應州人也天成中封為沛國夫人清泰初

百官三上表請立中宮遂立為皇后后性強戾末帝甚

憚之故其弟延皓自鳳翔牙校環歲之間厯樞密使出

為鄴都留守皆由后內政之力也及延皓為張令昭所逐執政請行朝典后力制之止從罷免而已晉高祖入洛后與末帝俱就燔焉

史臣曰三代之興亡雖由于帝皇亦繫於妃后故夏之興也以塗山及其亡也以妹喜商之興也以簡狄及其亡也以妲己周之興也以文母及其亡也以褒姒觀夫貞簡之為人也雖未偕于前代亦無虧于懿範而劉后以牝雞之晨皇業斯墜則與夫三代之興亡同矣餘無

進賢輔佐之德又何足道哉

案五代史無外戚傳據五代會要武皇長女瓊華長

公主降孟知祥同光二年十二月封第二女瑤英長公主降張延釗同光三年二月封明宗長女永寧公主降晉高祖第十三女興平公主降趙延壽天成三年四月封至長興四年九月改封齊國公主至清泰三年二月進封燕國長公主第十四女壽安公主長興四年六月封第十五女永樂公主長興四年六月封今改會要所載亦多舛互如瓊華公主十國春秋諸書作太祖弟克讓之女會要以爲武皇長女此傳聞之異辭也莊宗女義寧公主降宋廷浩廷浩仕至房州刺史晉初爲汜水關使張從賓之叛戰死見東都事畧及宋史又王禹偁小畜集有宋渥神道碑云母義寧公主天福中晉祖以當市莊宗有舊君之禮每貴主入見聽其不拜時兵戎方熾經費不充惟公主之家賜予甚厚盡而復取亦無倦色一日晉祖從容謂貴主曰朕于主家無所愛惜但

朝廷多事府庫甚虛主所知矣今輦轂之下桂王為憂
可命渥分司西京以豐就養因厚遣之且勅留司具晨
昏伏臘之用至于醢醢率有備焉會要不載莊宗女幾
人是其闕畧也惟明宗諸女記之稍詳然攷薛史趙延
壽傳其娶明宗小女為繼室歐陽史亦云耶律德光為
延壽娶從益妹是為永安公主而會要不載則其闕漏
者亦多矣

舊五代史卷四十九

舊五代史卷四十九攷證

唐后妃傳一得李匡儔妻張氏 李匡儔原本避宋諱

作李儔今據新唐書藩鎮傳增入

太后餞於汾橋 汾橋原本作渭橋今據通鑑注改正

舊五代史卷四十九攷證